

七

豫醫西雙壁

儒門事親三

七冊



儒門事親卷之七

戴人張子和著

新安吳勉學校

燥形

臂麻不便八十九

鄆城梁賈人年六十餘忽曉起梳髮覺左手指麻斯須半臂麻又一臂麻斯須頭一半麻比及梳畢從脇至足皆麻大便二三日不通往問他醫皆云風也或藥或針皆不解求治于戴人戴人曰左手三部脉皆伏比右手小三倍此枯澁痺也不可純歸之風亦有火燥相兼乃命一涌一泄一汗其麻立已後以辛涼之劑調之潤燥之劑濡之惟小指次指尙麻戴人曰病根已去此餘烈也方可針谿谷谿谷者骨空也一日晴和往針之用靈樞中雞足法向上臥針三進三引訖復卓針起向下臥針送入指間皆然手熱如火其麻全去昔劉河間作原病式常以麻與澁同歸燥門中真知

病機者也

大便燥結九十

戴人過曹南省親有姨表兄病大便燥澁無他證常不敢飽食飽則大便極難結實如針石或三五日一如圓目前星飛鼻中血出肛門連廣腸痛極則發昏服藥則病轉劇烈巴豆芫花甘遂之類皆用之過多則困瀉止則復燥如此數年遂畏藥性暴急不服但臥病待盡戴人過診其兩手脉息俱滑實有力以大承氣湯下之繼服神功丸麻仁丸等藥使食菠菱葵菜及猪羊血作羹百餘日充肥親知見駭之嗚呼粗工不知燥分四種燥於外則皮膚皺揭燥於中則精血枯涸燥於上則咽鼻焦乾燥於下則便溺結閉夫燥之爲病是陽明化也水液寒少故如此然可下之當擇之藥之巴豆可以下寒甘遂芫花可下濕大黃朴硝可以下燥內經曰辛以潤之鹹以軟之周禮曰以滑養竅

孕婦便結九十一

戴人過東杞一婦人病大便燥結小便淋澁半生不娠惟常服疎導之藥則大便通利暫廢藥則結滯忽得孕至四五月間醫者禁疎導之藥大便依常爲難臨圓則力努爲之胎墜凡如此胎墜者三又孕已經三四月望前後溲溺結澁甘分胎墮乃訪戴人戴人診其兩手脉俱滑大脉雖滑大以其且妊不敢陡攻遂以食療之用花減煮菠薐葵菜以車前子苗作如雜猪羊血作羹食之半載居然生子其婦燥病方愈戴人曰余屢見孕婦利膿血下迫極努損胎但同前法治之愈者莫知其數也爲醫拘常禁不能變通非醫也非學也識醫者鮮是難說也

偏頭痛九十二

一婦人年四十餘病額角上耳上痛嗚呼爲偏頭痛如此五七年每痛大便燥結如彈丸兩目赤色眩運昏澁不能遠視世之所謂頭風藥餅子風藥白龍丸芎犀丸之類連進數服其痛雖稍愈則大便稍秘兩目轉昏澁其頭上針灸數千百矣連年著灸其兩目且將失明由病而無子一日問戴人戴人診其兩手脉急數而有力風熱

之甚也余識此四五十年矣遍察病目者不問男子婦人患偏正頭痛必大便澁滯結硬此無他頭痛或額角是三焦相火之經及陽明燥金勝也燥金勝乘肝則肝氣鬱肝氣鬱則氣血壅氣血壅則上下不通故燥結於裏尋至失明治以大承氣湯令河水煎三兩加芒硝一兩煎殘頓令溫合作三五服連服盡蕩滌腸中垢滯結燥積熱下泄如湯二十餘行次服七宣丸神功丸以潤之蒺藜葵菜猪羊血爲羹以滑之後五七日十日但遇天道晴明用大承氣湯夜盡一劑是痛隨利減也三劑之外目豁首輕燥澤結釋得三子而終

腰膀痛九十三

一男子六十餘病腰尻脊膀皆痛數載不愈晝靜夜躁大痛往來屢求自盡天年旦夕則痛作必令人以手槌擊至五更雞鳴則漸減向曙則痛止左右及病者皆作神鬼陰譴白虎齧朝禱暮祝覘巫僧道禁師至則其痛以減又夢鬼神戰鬪相擊山川神廟無不祭者淹延歲月肉瘦皮枯飲食減少暴怒日增惟候一死有書生曰既云

鬼神虎鬻陰譴之禍如此禱祈何無一應聞陳郡有張戴人精於醫可以問其鬼神
白虎與病乎彼若術窮可以委命其家從之戴人診其兩手脉皆沉滯堅勁力如張
絙謂之曰病雖瘦難於食然腰尻脊膀皆痛者必大便堅燥其左右曰有五六日或
八九日見燥糞一兩塊如彈丸結硬不可言曾令人剝取之僵下一兩塊渾身燥痒
皮膚皺揭枯澁如麩片戴人既得病之虛實隨用大承氣湯以薑棗煎之加牽牛頭
末二錢不敢言是瀉劑蓋病者聞煖則悅聞寒則懼說補則從說瀉則逆此弊非一
日也而况一齊人而傳之衆楚人咻之乎及煎成使稍熱嚙之從少至多累至三日
天且晚臟腑下泄四五行約半盆以燈視之皆燥糞燥屎塊及瘀血雜臟穢不可近
須臾痛減九分昏睡鼻息調如常人睡至明日將夕始覺饑而索粥溫涼與之又困
睡一二日其痛盡去次令飲食調養日服導飲丸甘露散滑利便溺之藥四十餘日
乃復嗚呼再傳三十六虎書三十六黃經及小兒三十六吊誰爲之耶始作俑者其
無後乎古人以醫爲師故醫之道行今之人以醫辟奴故醫之道廢有志之士耻而

不學病者亦不擇精粗一槩待之常見官醫迎送長吏馬前唱諾真可羞也由是通
今博古者少而師傳遂絕靈樞經謂刺與汗雖久猶可拔而虛結與閉雖久猶可解
而決去腰脊膂痛者足太陽膀胱經也膂痛足少陽膽經之所過也難經曰諸痛爲
實內經曰諸痛痒瘡瘍皆屬心火注曰心寂則痛微心燥則痛甚人見巫覡僧道禁
師至則病稍去者心寂也然去其後來者終不去其本也古之稱痛隨利減不利則
痛何由去病者既痊乃壽八十歲故凡燥證皆三陽病也

寒形

因寒腰強不能屈伸九十四

北人衛德新因之析津冬月飲寒則冷病腰常直不能屈伸兩足沉重難於行步途
中以牀舁遞程程問醫皆云腎虛以菰蓉芭戟附子鹿茸皆用之大便反秘潮熱上
周將經歲矣乃乞拯於戴人戴人曰此疾十日之効耳衛曰一月亦非遲戴人曰足
太陽經血多病則腰似折膈如結膈如裂太陽所至爲屈伸不利况腰者腎之府也

身中之大關節今既強直而不利宜鹹以軟之頓服則和柔矣難經曰強力入房則腎傷而髓枯枯則高骨乃壞而不用與此用同今君之證太陽爲寒所遏血墜下滯腰間也

必有積血非腎也節次以藥可下數百行約去血一二斗次以九曲玲瓏竈蒸之汗出三五次而愈初蒸時至五日問曰腹中鳴否德新曰未也至六日覺鳴七日而起以能損人戴人曰病有熱者勿蒸蒸則損人目也

寒疝亦名水疝九十五

律科王敏之病寒疝臍下結聚如黃瓜每發遶腰急痛不能忍戴人以舟車丸猪腎散下四五行覺藥繞病三五次而下其瀉皆水也猪腎甘遂皆苦寒經言以寒治寒萬舉萬全但下後忌飲冷水及寒物宜食乾物以寒疝本是水故也卽日病減八分食進一倍又數日以舟車丸百餘粒通經散四五錢服之利下候三四日又服舟車丸七八十粒猪腎散三錢乃健步如常矣

一僧病疝發作冷氣上貫齒下貫腎緊若繩挽兩睪時腫而冷戴人診兩手脉細而弱斷之曰秋脉也此因金氣在上下伐肝木木畏金抑而不伸故病如是肝氣磳磳不能下榮於睪丸故其寒實非寒也木受金制傳之胃土胃爲陽明故上貫齒病非齒之病肝木者心火之母也母既不伸子亦屈伏故下冷而水化乘之經曰木鬱則達之土鬱則泄之令涌泄四次果覺氣和睪丸痒而暖戴人曰氣已入睪中矣以茴香木茂之藥使常服之首尾一月而愈

感風寒九十六

戴人之常谿也雪中冒寒入浴重感風寒遂病不起但使煎通聖散單服之一二日不食惟渴飲水亦不多飲時時使人搥其股按其腹凡三四日不食日飲水一二十度至六日有譫語妄見以調胃承氣湯下之汗出而愈戴人常謂人曰傷寒勿妄用藥惟飲水最爲妙藥但不可使之傷常令揉散乃大佳耳至六七日見有下證方可下之豈有變異哉奈何醫者禁人飲水至有渴死者病人若不渴強與水飲亦不肯

飲耳戴人初病時鼻塞聲重頭痛小便如灰淋汁及服調胃承氣一兩半覺欲嘔狀探而出之汗出皦皦然須臾下五六行大汗一日乃瘳當日飲冰水時水下則痰出約一二碗痰卽是病也痰去則病去也戴人時年六十一

凍瘡九十七

戴人女僮足有寒瘍俗云凍瘡戴人令服舟車丸濬川散大下之其瘡遂愈人或疑之戴人曰心火降則寒消何疑之有

寒痰九十八

一婦人心下臍上結硬如斗按之如石人皆作病胎鍼灸毒藥禱祈無數如捕風然一日戴人見之曰此寒痰診其兩手寸脉皆沉非寒痰而何以瓜蒂散吐之連吐六七升其塊立消過半俟數日後再吐之其涎沫類雞黃腥臭特殊約二三升凡如此者三後以人參調中湯五苓散調之腹已平矣

瀉利惡寒九十九

東門一男子病瀉痢不止腹鳴如雷不敢冷坐坐則下注如傾諸醫例斷爲寒證乾薑官桂丁香豆蔻之屬枯礬龍骨皆服之矣何鍼不燔何艾不炷遷延將二十載矣一日問于戴人戴人曰兩手寸脉皆滑余不以爲寒然其所以寒者水也以茶調散涌寒水五七升無憂散泄積水數十行乃通因通用之法也次以五苓散淡劑滲泄利之道又以甘露散止渴不數日而冷食寒飲皆如故此法王啟玄稔言之矣奈無人用之哉

內傷形

因憂結塊一百

息城司候聞父死于賊乃大悲哭之罷便覺心痛日增不已月餘成塊狀若覆杯大痛不住藥皆無功議用燔鍼炷艾病人惡之乃求于戴人戴人至適巫者在其傍乃學巫者雜以狂言以謔病者至是大笑不忍回面向壁一二日心下結塊皆散戴人曰內經言憂則氣結喜則百脉舒和又云喜勝悲內經自有此法治之不知何用鍼

灸哉適足增其痛耳

病怒不食一百一

項闢令之妻病食不欲食常好呌呼怒罵欲殺左右惡言不輟衆醫皆處藥幾半載尙爾其夫命戴人視之戴人曰此難以藥治乃使二娼各塗丹粉作伶人狀其婦大笑次日又令作角觝又大笑其旁常以兩個能食之婦誇其食美其婦亦索其食而爲一嘗之不數日怒減食增不藥而瘥後得一子夫醫貴有才若無才何足應變無窮

不寐一百二

一富家婦人傷思慮過甚二年不寐無藥可療其夫求戴人治之戴人曰兩手脉俱緩此脾受之也脾主思故也乃與其夫以怒而激之多取其才飲酒數日不處一法而去其人大怒汗出是夜困眠如此者八九日不寤自是而食進脉得其平

驚一百三

衛德新之妻旅中宿于樓上夜值盜劫人燒舍驚墮牀下自後每聞有響則驚倒不知人家人輩躡足而行莫敢冒觸有聲歲餘不痊諸醫作心病治之人參珍珠及定志丸皆無效戴人見而斷之曰驚者爲陽從外入也恐者爲陰從內出驚者爲自不知故也恐者自知也足少陽膽經屬肝木膽者敢也驚怕則膽傷矣乃命二侍女執其兩手按高椅之上當面前下置一小几戴人曰娘子當視此一木猛擊之其婦大驚戴人曰我以木擊几何以驚乎伺少定擊之驚也緩又斯須連擊三五次又以杖擊門又暗遣人畫背後之牕徐徐驚定而笑曰是何治法戴人曰內經云驚者平之平者常也平常見之必無驚是夜使人擊其門牕自夕達曙夫驚者神上越也從下擊几使之下視所以收神也一二日雖聞雷亦不驚德新素不喜戴人至是終身厭服如有人言戴人不知醫者執戈以逐之

兒寐不寤一百四

陳州長吏一小兒病寐而不寤一日諸醫作睡驚治之或欲以艾火灸之或以大驚

丸及水銀餅子治之其父曰此子平日無疾何驟有驚乎以子之病乃問于戴人戴人診其兩手脉皆平和戴人曰若驚風之脉當洪大而強今則平和非驚風也戴人竊其乳母爾三日前曾飲醉酒否遽然笑曰夫人以煮酒見餉酒味甚美三飲一壺而睡陳酒味甘而戀隔酒氣滿乳兒亦醉也乃剉甘草乾葛花縮砂仁貫衆煎汁使飲之立醒

孕婦下血一百五

劉先生妻有娠半年因傷損下血乞藥於戴人戴人診之以三和湯一名玉燭散承氣湯四物湯對停加朴硝煎之下數行痛如手拈下血亦止此法可與智識高明者言高粱之家慎勿舉似非徒駭之抑又謗之嗚呼正道難行正法難用古今皆然

收產傷胎一百六

一孕婦年二十餘臨產召穩媼三人其二媼極抽婦之臂其一媼頭抵婦之腹更以兩手扳其腰極力爲之胎死于腹良久乃下兒亦如血乃穩媼殺之也豈知瓜熟自

落何必如此乎其婦因茲經脉斷閉腹如刀刺大渴不止小溲澀絕主病者禁水不與飲口舌枯燥牙齒齩黑臭不可聞食飲不下昏憤欲死戴人先以冰雲水恣意飲之約二升許痛緩渴止次以舟車丸通經散前後五六服下數十行食大進仍以桂苓甘露散六一散柴胡飲子等調之半月獲安

又一婦人臨產召村嫗數人侍焉先產一臂出嫗不測輕重拽之臂爲之斷子死于腹其母面青身冷汗漿漿不絕時微喘嗚呼病家甘于死忽有人曰張戴人有奇見試問之戴人曰命在須臾針藥無及急取秤鈎續以壯繩以膏塗其鈎令其母分兩足向外偃坐左右各一人脚上立足次以鈎其死胎命一壯力婦倒身拽出死胎下敗血五七升其母昏困不省待少頃以冰水灌之漸嚥二日大醒食進次日四物湯調血數日方愈戴人常曰產後無他事因侍嫗非其人轉爲害耳

懷恐脇痛一百七

洛陽孫伯英因誣獄妻子被繫逃于故人是夜覺胃脇痛託故人求藥故人曰有名

醫張戴人適在焉當與公同往時戴人宿酒未醒強呼之故人曰吾有一親人病欲求診戴人隔牕望見伯英曰此公伏大驚恐故人曰何以知之戴人曰面青脫色膽受怖也後會赦乃出方告戴人

背疽一百八

一富家女子十餘歲好食紫櫻每食卽二三斤歲歲如此至十餘年一日潮熱如勞戴人診其兩手脉皆洪大而有有力謂之曰他日必作惡瘡腫毒熱上攻目陽盛陰脫之證其家大怒不肯服解毒之藥不一二年患一背疽如盤痛不可忍其女忽思戴人曾有是言再三悔過請戴人戴人以銑針繞疽暈刺三百針去血一斗如此三次漸漸痛減腫消微出膿而斂將作痂時使服十補內托散乃痊終身忘口然目亦昏終身無子

肺癰一百九

舞水一富家有二子長者年十三歲幼者十一歲皆好頓食紫櫻一二斤每歲須食

半月後一二年幼者發肺癰長者發肺痿相繼而死戴人常歎曰人之死者命耶天耶古人有詩爽口味多終作疾真格言也夫生白果所以養人非欲害人然富貴之家失教縱欲遂至於是

咽中刺塞一百十

戴人過隱陽强家一小兒約五六歲同隊小兒以蜀黍楷相擊逆芒倒刺於咽中數日不下粥藥腫大發其家告戴人戴人命取水依道經中呪水法以左手屈中指及無名指作三山印坐水盞于其上右手掐印文是金鎗印脚踏丁字立望太陽或燈火取氣一口吹在淨水盞中呪曰吾取老君東流順老君奉勅攝去毒水吾托大帝尊所到稱吾者各各現帝身急急如律令攝念七遍吹在盞中虛攪卓三次爲定其兒嚙水下咽曰我可也三五日腫散乃知法亦有不可侮者

誤吞物咽中一百十一

一小兒誤吞一錢在咽中不下諸醫皆不能取亦不能下乃命戴人戴人熟思之忽